

Script Of Evening Gojri News Bulletin 30 June 2024 at 1700 Hrs

ایوننگ گو جری نیوز بلیٹن مورخہ 30 جون 2024

یوہ آکاشوانی جموں بے باغ علی طاہر تے جاوید چودھری تیں خبر سُنو۔ پہلاں خاص خاص خبر۔

*1- وزیر اعظم نریندر مودی غو کہنو بے جے من کی بات پروگرام بھارت غا امیر ثقافتی ورثہ تاریخ تے بھارت نانہہ ترقی یافتہ بنان واسطے تبادلہ خیال غی خاطر جاری رہ گو۔

*2- لیفٹنٹ جنرل اوپندرہ دوی ویدی نے نواں فوجی سربراہ غو عہدو سمہال لیو بے
*3- ریاسی دہشت گردانہ حملہ غا سلسلہ مانہہ قومی تحقیقاتی ایجنسی این آئی اے نے راجوری ضلع غا 5 بکھ بکھ مقامات ور چھا پہ ماریا ہیں۔

*4- تے امرناتھ یا تری دوہاں بنیا دی کیمپاں تیں امرناتھ گُفہ غا درشنان واسطے اگلا سفر در روانہ کیا گیا ہیں۔

خبران غی تفصیل نال پہلاں باغ علی طاہر۔

PM MKB

وزیر اعظم نریندر مودی نے لوک سبھا چناواں مانہہ لوکاں غی بھر پور شرکت اور آئین تے جمہوری نظام مانہہ بھروسو کیا جان ور عوام غو شکریو ادا کیو بے۔ من کی بات پروگرام مانہہ لوکاں سنگ خطاب کرتاں واں انہاں نے تمام لوکاں تے چناؤ کمیشن نانہہ مبارک دتی۔ وے اج سویرے اپنا من کی بات پروگرام غے دوران آکاشوانی ور لوکاں سنگ اپنا خیالات سانجھا کر رپیا تھا۔ وزیر اعظم نے اس پروگرام غے دوران جموں کشمیر غا پرفانی مٹر غیمثال دیتاں واں دسیو جے اس قسم غا مٹر غی پہلی کھیپ حال ہی مانہہ لندن روانہ کیگئی بے۔ اُن غو کہنو تھو جے گذشتہ 10 بہراں غے دوران بھارت غا جنگلاتی رقبہ مانہہ توسیع ہوئی بے۔ انہاں نے دسیو جے اُمرت مہا اُتسو غے دوران 60 ہزار تیں متا سرور پورا ملک مانہہ تیار کیا گیا ہیں۔ انہاں نے اک وری پھر لوکاں سنگ من کی بات پروگرام غے ذریعے مخاطب ہون ور خوشی ظاہر کی۔ انہاں نے کہیو جے من کی بات غے ذریعے لگاتار بھارت غی امیر ثقافت، تاریخ تے بھارت نانہہ ترقی یافتہ بنان غا سلسلہ مانہہ کی جان آلی کو ششاں بارے تبادلہ خیال کیو جا سکے۔ وزیر اعظم غی طرفوں لگاتار تیجی وری وزارتِ عظمیٰ غا عہدہ ور فائز ہون غے بعد من کی بات پروگرام غو یوہ پہلو شمارو تھو۔ جد کہ مجموعی طور ور اس پروگرام غے تحت یوہ 1 سو 11 ووں شمارو نشر تے ٹیلی کا سٹ کیو گیو بے۔

Army Chief Oath

لیفٹنٹ جنرل اُپندرہ دوی ویدی نے اگلا چیف آف آرمی سٹاف یعنی فوجی سربراہ غو عہدو سمہال لیو بے۔ اج نویں دہلی مانہہ اک تقریب غے دوران انہاں نے سبکدوش ہون آلا فوجی سربراہ جنرل منوج پانڈے تیں یوہ عہدو سمہال لیو بے۔ جن غا عہدہ غی مدت اج ختم ہو گئی۔ وے 26 مہیناں توڑی اس عہدہ غی مدت ور فائز رپیا۔ اُدھم پور بنیا د آلی شمالی کمان غی قیادت کرن آلا لیفٹنٹ جنرل دوی ویدی گذشتہ 16 سال غا عرصہ غے بعد ایسا پہلا

لیفٹنٹ جرنل ہیں۔ جن نانہہ فوج غا سربراہ غا عہدہ ور فائز کیو گیو ہے۔ پہلی جولائی سن 1964 مانہہ پیدا ہوا جرنل دوی ویدی جموں کشمیر رائفلز انفنٹری مانہہ 15 دسمبر سال 1984 مانہہ شامل ہوا تھا۔ 40 بہراں غی ان غی فوجی خدمات غے دوران انہاں نے بکھ بکھ عہداں ور اپنی ذمہ داری نبھاتی ہیں۔ وائس چیف آف آرمی سٹاف غا عہدہ ور فائز کیا جان تیں پہلاں جناب دوی ویدی ڈائریکٹر جنرل انفنٹری تے صدر دفتر شمالی کمان غا جرنل افسر کمانڈینگ ان چیف غا طور ور سال 2022 تیں سال 2024 توڑی فائز رہیا۔

New Criminal Laws

ترے نواں فوجداری قانون بھارتیہ نیا نے سنہیتا سال 2023، بھارتیہ نا رگریک سرکشہ سنہیتا 2023 تے بھارتیہ سکشے آدھینیم 2023 پلک یعنی پہلی جو لائی تیں لاگو ہو جائیں گا۔ مرکزی سرکار نے ریاستاں تے مرکزی زیر انتظام علاقاں سنگ لگاتار میٹنگ منعقد کی ہیں۔ تے یہ ٹیکنالوجی صلاحیت تے بیداری پیدا کرن غا اعتبار سنگ مکمل طور ور ان قوانین نانہہ لاگو کرن واسطے تیار ہیں۔ ان فوجداری قانون غی عمل آوری غی خاطر پولیس تے تحقیقاتی ایجنسیاں غی تربیت وی مکمل کی جا چکی ہیں۔ تانجے اس نواں نظام در بہتر طریقہ سنگ منتقلی نانہہ یقینی بنایو جا سکے۔ واضع رہ جے ان نواں فوجداری بلاں نانہہ گذشتہ سال گا سرمائی اجلاس غے دوران پارلیمنٹ نے منظوری دتی تھی۔ ان نواں فوجداری قانوناں غی عمل آوری سنگ بھارتی شہریاں نانہہ با اختیار بنان غی سمت مانہہ یوہ اک نمایاں قدم ہے۔

LG Role Of Academic

لیفٹنٹ گورنر منوج سنہا نے کل نیشنل انسٹیٹیوٹ آف ٹیکنالوجی سرینگر مانہہ جموں کشمیر غی ترقی پزیر معیشت آر اے ایس ای 2024 غا عنوان ور 2 روزہ قومی کانفرنس سنگ خطاب کیو۔ اپنا خطاب غے دوران لیفٹنٹ گورنر نے صنعت تے تدریسی سرگرمیاں غا رابطہ تے بہتر ماحول پیدا کرن غا اقدامات غی سراہنا کی۔ انہاں نے طالب علماں ور زور پایو جے وے بہتر کم ور مبنی اپنا اہداف مقرر کریں۔ تانجے صنعتی ترقی غا خواب نانہہ پوراں کیو جاسکے۔

T20 World Cup

عالمی ٹرافی جتن غو بھارت غو 11 سالہ انتظار اُس ویلے ختم ہو گیو جد روبرت شرما غی قیادت مانہہ بھارتی کرکٹ ٹیم نے کل مرداں گا ضمیرہ مانہہ آئی سی سی ٹی ٹوانٹی عالمی کپ فائنل مقابلہ مانہہ جنوبی افریقہ نانہہ ہرا دتو۔ گذشتہ رات کینگزٹن اوول کرکٹ سٹیڈیم مانہہ کھیڈیا گیا اس فائنل مقابلہ مانہہ بھارت نے جنوبی افریقہ نانہہ 7 دوڑاں سنگ شکست دے دتی۔ ٹاس جیت غے پہلاں بلے بازی کرن غا بھارت غا فیصلہ غے بعد ویراٹ کوہلی غا 76 تے اکسر پٹیل غا 47 رنز غی بدولت بھارت نے 7 وکٹاں غا نقصان ور کل 1 سو 76 دوڑ بنائیں۔ 20 اوراں غا ٹی 20 عالمی کپ غا کسے فائنل مقابلہ مانہہ ہن توڑی غو یوہ سب تیں بڑو سکور ہے۔ جنوبی افریقہ 8 وکٹاں غا نقصان ور چھڑا 169 رنز ہی بنا سکی۔ تے اُس غا 8 کھڈاری آؤٹ ہوا۔ جنوبی افریقہ غی طرفوں ہنرچ کلاس نے سب تیں رنز سکور کیا۔ بھارت غی طرفوں ہاردک پانڈیا نے 3 جد کہ جسپریت ہمرا تے ارشدیپ نے 2/2 کھڈاریاں نانہہ آؤٹ کیو۔ ویراٹ کوہلی نانہہ میچ غو بہترین کھلاڑی غا اعزاز سنگ نوازیو گیو۔ انہاں نے ٹورنامنٹ گا کل 8 مقابلوں مانہہ کل 15 وکٹ حاصل کیں۔ واضع رہ جے

بھارت نے ٹی 20 گو یوہ دوجو عالمی کپ اپنے ناں کیو ہے۔ اس توں پہلاں سال 2007 مانہہ وی بھارت ٹی 20 گو عالمی چمپئن بن گیو تھو۔ اس گے بعد سال 2013 مانہہ بھارت نے چمپئن ٹرافی گو اعزاز وی حاصل کیو تھو۔ بھارت غا دو عظیم کرکٹ کھلاڑی روبرت شرما تے ویراٹ کوہلی نے اس فائنل مقابلہ غے بعد ٹی ٹوانٹی بین القوامی کرکٹ تیں اپنی ریٹائرمنٹ غو اعلان کر دتو۔

یہ خبر تم آکا شوانی جموں تیں سن رہیا ہیں خبراں غا باقی حصہ نال جا وید چودھری۔

NIA Reasi

قومی تحقیقاتی ایجنسی این آئی اے نے اج ریا سی دہشت گردانہ حملہ غی پاداش مانہہ ضلع راجوری گا 5 بکھ بکھ مقامات ور چھاپہ ماری کی ہے۔ واضع رہ جے گذشتہ 9 جون نانہہ ضلع ریا سی غا پونی علاقہ مانہہ شیو کھوڑی تیں کٹڑھ جان آلی مسافر بس ور دہشت گردان نے فائرنگ کر دتی تھی۔ جس غی وجہ نال بس اک نزدیکی کھائی مانہہ جا لگی۔ اس حملہ گا نتیجہ مانہہ اک بچہ سمیت 9 افراد ہلاک ہو گیا تھا۔ اس غے بعد 15 جون نانہہ وزارت داخلہ غا حکم نامہ غے بعد این آئی اے نے اس معاملہ نانہہ تحقیقات غی خاطر اپنا ہتھ مانہہ لیو تھو۔ یاہ چھاپہ ماری دہشت گردان تے ان گا سہولت کاراں غی تلاش مانہہ کی گئی ہے۔ ان مقامات غی نشاندہی پہلاں تیں گرفتار کیا گیا ملزم حاکم خان غی نشاندہی ور کیگئی۔ جنہاں نے مبینہ طور ور دہشت گردان نانہہ محفوظ پناہ تے کھانو وغیرہ مہیا کرایو تھو۔

Amarnath Yatra

اج سویرے امرناتھ جی یا تریاں گو دوجو جتھو سخت حفاظتی انتظام بشکار کشمیر غا دویاں بنیادی کیمپاں تیں نکلیو۔ اس یا ترہ غے پہلے تہاڑے 13 ہزار تیں متا یا تریاں نے پوتر فہ غا درشن کیا۔ اسے دوران اس یا ترہ غو تیجو جتھو اج سویرے بھگوتی نگر یا تری نواس تیں 6 ہزار 6 سو 19 افراد ور مشتمل جتھو روانہ ہوؤ۔ اس سلسلہ مانہہ شری امرناتھ جی یا تریاں غو ربن غو بندوبست حفاظتی طریقہ سنگ بھگوتی نگر یا تری نواس جموں مانہہ کیو گیو ہے۔ جموں کشمیر انتظامیہ نے یا تریاں واسطے تمام ضروری حفاظتی انتظامات کیا ہیں۔ آکا شوانی نال گل کرتاں واں عقیدت منداں نے کہیو ہے جے انتظامیہ غی طرفوں سلامتی انتظامات و دیگر رہا نشی سہولیات بہتر طریقہ نال مہیا کرانی جا رہی ہیں۔

DC Ramban

شری امرناتھ جی یا ترا غے چلتیں بہتر سہولیات مہیا کران غی خاطر ڈی سی رام بن بصیر الحق چودھری ، ایس ایس پی رامبن انوج کمار تے کجھ سننیر عہدیداراں نے لمبیر گروونڈ بانہال مانہہ لایا گیا لنگر غو معائنو کیو۔ اس دوران ڈی سی موصوف نے سب ڈویژنل انتظامیہ غی ٹیم غی طرفوں مہیا کی گئی سہولیات و انتظامات ور تسلی غو اظہار کیو۔ اس دوران انہاں نے ایس ڈی پی او بانہال غی سراہنا کرتاں واں کہیو جے یا تریاں واسطے رہا نش سہولیات غے نال نال سلامتی صورتحال نانہہ برقرار رکھ غے انہاں واسطے بہتر کھان پین غا انتظامات غا سلسلہ مانہہ بہتر کوشش انجام دتی گئی ہیں۔ آکا شوانی نال گل کرتاں واں ڈی سی رام بن بصیر الحق نے اس طرح کہیو۔۔۔ بانٹ۔

Poonch Medical

گورو بر گو بند سنگھ جی غی یا د مانہ ضلو پو نچھ مانہ اک طبی کیمپ غو افتتاح کیو
گیو۔ اس طبی کیمپ غو افتتاح گورو درواہ یا د گار سنت بھائی بہا در سنگھ جی کھری درہم
سال پونچھ مانہ کیو گیو۔ اس کیمپ مانہ طبی پیشہ وارانہ غا گروپ نے مفت طبی جانچ
غے نال نال ضرورت منداں واسطے دوانی وی تقسیم کیں۔

Draft Development

جموں کشمیر سرکار نے بلدیاتی ترقیات مانہ ضروری اقدامات غی خاطر اک ترقیات
پالیسی 2024 تیار کی ہے۔ اس پالیسی مانہ بلدیاتی ترقیات نے عام لوکاں غی طرفوں
عرضی تے صلاح ناہے مدعو کیو ہے۔ اس آغاز غے مد نظر بلدیاتی ترقیات محکمہ گا
کمشنر سیکریٹری نے 26 تے 29 جون 2024 ناہے سول سیکریٹریٹ سرینگر تے جموں
مانہ شراکت داراں غی اک میٹنگ منعقد کی۔

اس غے نال ہی خبراں غو یوہ بلیٹن ختم ہوؤ۔